



#03 - OTTOBRE - NOVEMBRE 2009

A PIAZZETTA


UN GIURNALE SCHERZOSU, PULITICAMENTE SCURRETTU È CERTE VOLTE APPENA GATTIVU

2000 ANNI

DI LOSERS È DI WINNERS IN CORSICA

U PRIMU TABLOID
GRÀTISI IN
LINGUA CORSA

0€



ballò

A dream team di i più gattivi di u Sporting



attualità

Ciò chì s'hè passatu...



WWF

A fine di u populu corsu ?



A Piazzetta hè un giornale gràtisi chì esce tutti i dui mesi, publicatu grazie à u premiu **Ghjovani in Mossa**.

S'è vo avete ancu voi un prugettu, andate à vede : www.corse.fr/jeunesse_sport/

Stu giornale hè statu publicatu dinù grazia à l'aiutu di a cumpagnia Corsica Ferries.

Hè editatu da :

L'associu Lingua Scritta
Res. Orezza 2 20200 Bastia

Hè realizatu da :

Una squadra di benevolentì

Hè statu stampatu in Corsica

à 12 000 esemplarii :
Stamperia AZ Diffusion
Erbaghjolu 20600 Bastia

A Piazzetta hè dinù un situ internet :

www.apiazetta.com
apiazetta@free.fr

ISSN : 2101-9193



Glacier

Café

Idéal

Piazza di u mercà di Bastia

Ciò chì s'hè passatu... **VERAMENTE**

Top 50

Catastrofa mundiale : hè mortu Michael Jackson. U mondu sanu pienghjè, i fans s'adduniscenu per lamenti cullettivi giganteschi. Purtantu, durante i sulleoni di u 2003, murianu i vechji in l'indiferenza generale.



I will survive

Inchiesta internaziunale : i Francesi dichjarati per a terza volta consecutiva «**peghju turisti di u mondu**». Sò dunque ricunnisciuti di manera mundiale cum'è i più azezi, i più rancichi, i più scrianzati, è i menu forti per amparà e lingue strangere. L'estate hà da esse longu.

Bettunizzazione

In Corsica i permessi di custrisce sò **crisciuti di 49%** per l'annata 2008. I vechji prugetti chì ùn si sò pussuti fà 30 anni fà escenu da i cartoni. 50% di e case nove custrate in Portivechju sò cumprate da fresteri. Tuttu vò bè.

Primu Rush

A stagione cummencia bè : una banda di 2 chilòmetri di rumènzule chì

vènu da l'Italia ghjunghjenu nant'à e nostre coste. I primi mullizzi ùn sò micca scalati per battellu quist'annu.

Guignols

L'ATC lancia a so campagna pubblicitaria : «u turismu (sic) hè l'affari di tutti».

Pippulacci

Corse-Matin attacca forte : prima pàgina cun «Les peuples bougent à Porto-Vecchio» cun DJ Corti, Titof, Elie Semoun... Aspettendu à Muriel Robin, Jean-Pierre Pernaut, Jean-Marie Bigard, Mireille Mathieu è Pascal Obispo. I mullizzi ùn sò micca tutti in Tighjime.

Frittella o panzarottu ?

Should I stay or should I go ? Paul Giacobbi hà da entre o nò in u governu. Per fà u footing cun Sarko ?

Baccalà per Corsica

I risultati di u baccu sò cunnisciuti. A Corsica sempre ultima. Ultima dinù per a qualificazione di i giovani è prima per l'abandonu di i studii dopu à u baccu. Ùn face nunda u mo figliolu, ferai «garçon de café» l'estate o purterai u caddie di i ricchi golfeurs. L'educazione ùn hè micca l'affare di tutti.

Squadra Corsa

Successu per u scontru Corsica – Congo chì finisce 1 à 1 è bella emuzione à u mumentu di l'inni in Mezavia. Pulèmica in u Ribombu : Didier Rey hè scuntentu di i criteri di selezione di a Squadra Corsa è rigretta l'assenza di ghjudadori d'origine magrebina. Vi rendite contu si u selezionadore era Raymond Domenech ?

U focu basta ?

U focu piccia in a Gravona è l'Ortolu. Centinaie d'èttare distrutte, una catastrofa ecologica. Si scatineghjanu i facebookisti corsi : «soutien aux pompiers de Corse du Sud», «Soutien aux pompiers de Corse et aux victimes des incendies», «Encouragements aux pompiers corses qui luttent contre les flammes» è «morts aux incendiaires», «contre les pyromanes qui brûlent la Corse» è ancu «brûlons les incendiaires». Sfurtuna, s'ampara pocu dopu chì dui piròmani chì eranu à l'origine di u focu in Gravona eranu... pompieri.

O mà, sàlvammi u Tour de Corse

Votu impurtante à a CTC : hè salvatu u Tour de Corse ! Uf ! A suvvenzione per stu Giru d'Aiacciu hè di 900 000 euri. Invece, a lingua corsa ùn



C.L.A.M.E

Centru Laser Medicale Esteticu

04 95 32 80 01

15 Bd de Gaulle - Piazza San Niculà - BASTIA

Laser medicali
Estetica medicale
Benistà



serà micca salvata : una muzione dumandendu l'officialità hè ricusata. A cunneria hè l'affare di tutti.

Publicité mensongère

L'ACA ghjoca cù a scrizione «Libérez notre président» nant'è a so maglia. U Sporting puderia ghjucà cù «Chjudite à Frédéric Thiriez».

Bienvenue chez les Ch'tis

S'ampara chì u ghjucatore di u LOSC Pierre-Alain Frau hè statu pigliatu in ostaggiu, minacciatu, minatu è a so vittura arrubata da una banda di ladri. 3 filari in L'Equipe, 0 in u Figaro. Ah, s'ellu fussi statu neru è s'ellu avessi ghjucatu in Bastia...

Vitelli

Nicolas Sarkozy s'hè intesu vene menu è hè statu ospitalizatu. Risultatu : a so popularità piglia parechji punti. «Les Français sont des veaux», dicia quellu...

Turisti fora ?

In l'isula di Sheppey, Inghilterra, un odore assai forte rende malati i turisti chì sò obligati à fughje. In fatti, era u suvu, «l'engrais» di l'agricultori chì puzzava. Quandu vi diciamu ch'ellu ci vole à rilancià l'agricultura in Corsica...

Musicaccia

Cuncerti d'estate in Corsica : Grégoire, Patrick Fiori, Calogero, Serge Lama, Christophe Maé. Ùn manca più ch'è Vincent Delerm, Oreslan è Patrick Sébastien. «Corsica ùn averai mai bè», dicia quellu...

Fk you**

A canterina Lily Allen si definisce cum'è una zitella «tìmica». À vede i so ritratti in a versione inglese di a rivista « Elle », ùn avemu micca listessa definizione di a parolla «tìmica». Tutte manere, per una persona chì dichjarava à u giornale So Foot «aghju un disprezzu tremendu per a squadra di Francia », ùn pudemu avè ch'è rispettu per ella.



Azzuf baruf

U gruppu Oasis si separa. Liam Gallagher ùn supportava più u so fratellu Noël è anu finitu una discussione à colpi di cazzotti. È dopu diceranu torna chì i Corsi sò viulenti... Fidighjate à I Muvrini, Orizzonte, i fratelli Pesce o i Fratelli Vincenti. U esempju pè u rock !

Intervilles

Dunkerque mette una concia à Ajaccio à Intervilles, senza Guy Lux è Léon

Zitrone. Vivement le retour d'Alain Orsoni...



iFracicu

Si moltiplicheghjanu i casi d'Iphone chì schjattanu. Apple ùn sà più chì si fà. À quandu u primu attentatu à l'Iphone ?

X-files

Nant' à u situ di u Geipan (una antenna di u CNRS chì s'occupa di l'OVNI) si pò leghje pè a regione Corsica chì l'ultimi fenòmeni sò stati visti in u 2003 (<http://www.cnes-geipan.fr/geipan/regions/cor>) Purtantu, ne cunniscimu pienu : Jean Menconi, Fabrice Jau, Geneviève Moindrot, Alexandre-Guillaume Tollinchi...

Thiriez pàrlami corsu

Pè u so primu scontru à Rennes, Frédéric Antonetti hà ricevutu un messagiu da a parte di i sustenidori brittoni. Anu fattu un striscione induve si pudia leghje « Benvenuti in Breizh

BASTIA	04 95 32 80 61	Vivario	04 95 47 20 13
Casamozza	04 95 36 00 11	Tattone	04 95 47 21 22
Ponte Novu	04 95 38 60 72	Vizzavona	04 95 47 21 02
PONTE LECCIA	04 95 47 61 29	Bocognano	04 95 27 40 51
Francardo	04 95 47 40 48	AJACCIO	04 95 23 11 03
CORTE	04 95 46 00 97	ILE ROUSSE	04 95 60 00 50
Venaco	04 95 47 01 32	CALVI	04 95 65 00 61

BOITE VOCALE-HORAIRES
04 95 32 80 60



Anto ». Stranu chì a FFF è à LNF ùn essinu micca reagitu...



CR9 vs TV11

Cristiano Ronaldo firma à u Real Madrid davant' à 80 000 persone à Santiago Bernabeu. In listessu tempu, l'anzianu bastiacciu Tony Vairelles (36 anni) firma à u FC Gueugnon davant' à 8 persone.

Furiani, Albania...

A FIFA vole cundannà a federazione Albanese di futbòl per e cundizione d'accogliu catastrofiche di u stadiu di Tirana per u scontru Albania - Danemark : micca acqua calda in e docce, micca acqua in i cabinetti, micca cabinetti per e donne... Ci hè dunque peghju ch'è Furiani in Auropa.

Guerra batteriologica

A gendarmeria di Bunifaziu cuntaminata da u H1N1. I gendarmi sò stati dinù incaricati d'introduce

in Corsica u virus di l'influenza A ? Rendimu a cagula obbligatoria !



Santa di Niolu feat. David Ghjetta ?

Grossa pulèmica nant' à apiazetta. com : un articulu contr' à a tecnò in e baracche di a fiera susciteghjanu una discussione passionata. À chì difenda a Santa, à chì difende u Niolu, à chì prumette ch'ellu ùn cullerà mai più in Casamacciuli... In tutti i casi quist'annu u lobbying anti-tecnò hà viaghjatu, ùn c'era musicaccia in campu di fiera. Si ne sente abbastanza cusì tuttu l'annu, nò ?

Prison Break

Più forte ch'è u fax di a Brise de Mer è ch'è i tatuasgi di Michael Scofield : una scàtula. Jean-Pierre Treiber, alias « l'homme des bois » si ne fughje di a prigioni d'Auxerre in un cartone.

Dolu

I montasega aiaccini è bastiacci sò in dolu. Dopu à René di i Musclés è Sim, amparemu ch'ellu hè mortu Filip di u boys band i 2BE3. I tempi sò difficiuli pè a cultura francese.

Cultura

Paris Hilton face a so entrata in un dizziunariu di citazione inglese à cantu à Shakespeare. À quandu Nikos Aliagas, Luis Fernandez è Doc Gynéco à u programma di u baccu ?



Anti-pippulacci

Nant' à Facebook, più di 5 200 scritti à u gruppu « J'en ai marre des peuples qui viennent bétonner la Corse » è più di 800 pè « Ceux qui pensent que Corse-Matin est un stracciu pourri ». U cutitianu si n'impippa, chjode a stagione cun l'interviste di Pascal Obispo, Claire Chazal, u rè di Savoia è Philippe Gildas.



ALTORE WHISKY - PURE MALT

L'ABUS D'ALCOOL EST DANGEUREUX POUR LA SANTE



Vichy II, u ritornu ?

Ritornu in forza di a delazione, 60 anni dopu. A pulizza di l'Essone prova un novu metudu di dinunzia anònima, per email. A Francia và megliu.

Plus goffa la vie

U pruduttore di a seria « Plus belle la vie » vole turnà à neguzià u so cuntrattu cun France 3 (50 o 60% più caru...) è minaccia di piantà tuttu. Tè, infine una bona nutizia ?

A gastrò hè l'affare di tutti

Bagnassi à u mare di Piantaredda. Mutivu : « pollution d'origine fécale ». In causa : a saturazione di u locu (più di 300 battelli à ghjornu) è l'assenza d'ecchippamenti. Trè ghjorni dopu, Corse-Matin intituleghja « L'Extrême Sud pole d'attractivité des touristes ». Cuntinuvemu cusì, tuttu và

sempre bè...

Tutti in Naziunale

Dopu à 7 ghjurnate, u Sporting (5 disfatte) hè 19esimu, l'ACA 18esimu. Per infurmazione in « National » si ghjoca contr'à Fréjus, Plabennec, Rodez, Moulins, Cassis-Carnoux, Luzenac è un cosu chì si chjama « Evian Thonon Gaillard FC ». Ancu di grazia, ci ferma a K7 videò di l'epupea...

Versu l'interdizione di a Testa di Moru ?

Una regula nova di a LNF difende ch'elli sianu messi nant'à a maglia i «simbuli regionali» di più di 25cm² per e squadre professionali di futbol. U prublema hè chì solu u SCB ghjucava cù un «simbulu regionale» nant'à u pettu... Prussima tappa : a

prigiò per i furdani chì sventuleghjanu una bandera corsa è chì minaccianu a famosa «une et indivisible» ?



Allora o sgiò Musclor, cosa diventate ?

Sò à a ritirata in paese in u mo Castellu di L'Ombra, facciu appena l'ortu cù u mo amicu Skeletor, si passa pianamente è bè.

Site un veru biondu ?

Sigura ! Ancu chì in carrughju mi piglianu spesso per Patrick Juvet o Laurent Paganelli ! Una volta mi sò

Musclor : « anch'eiù beiu u whisky Altore »

ancu fattu passà per C. Jérôme...

cunsultante per 30 millions d'amis.

Dapoi quandu biite u whisky Altore ?

Aghju avutu un accidente durante un episodiu, mi sò pigliatu un colpu di spada in l'abdomen è stu connu di tigru di Kringer m'hà fraiatu. Tand u mi sò messu in malatia è aghju scupertu l'Altore.

Ghjustu à puntu cosa hè diventatu u vostru tigru ?

Hà avutu un rollu in Scarface è avà hè

Cumu vi piace di beielu l'Altore ?

Cun appena d'Orezza è un ghjacciu, hè un veru piacè. Ma sopr'à tuttu mi piace di beielu cù i mo amichi di u Corsica Bar, nant'à u Mercà.

Ma mi pare chì ùn avete micca scambiatu, site sempre u ghivanottu !

O connu, sò in plastique !

A fine di u populu corsu prevista per 2050 ?

Aborigeni, Inuit, Mapuche, Indiani... è à mumenti i Corsi feranu parte di populi smariti ?

In America Latina, si spèngjenu pocu à pocu i populi indiani. L'ultimi locutori d'antiche lingue di e vechje tribù smariscenu in l'indifferenza generale. Appena cum'è in Corsica ?

Un articulu esciutu in u Courier International era intitulatu «Certains peuples ne comptent plus qu'un seul membre». Una ONG, Survival International s'occupa di i populi indigeni minacciati di sparizione. Forse serà cuntattata un ghjornu per vene ind'è noi ?

L'UNESCO ella hà recensatu 2500 lingue (nant'à 6000 parlate oghje) cum'è essendu in periculu. A lingua corsa ne face parte.

Cun 4000 persone chì ghjunghjenu à l'annu, cù una lingua chì ùn hè più trasmessa da quelli chì sanu, a sucetà cambia à un ritimu spaventosu è a famosa «mascina à fabricà i Corsi» hè in panna.

D'appressu à e previsioni di i più pessimisti, a creazione di « l'amicale di i Corsi di Corsica » saria per u 2020

D'appressu à e previsioni di i più pessimisti, a creazione di «l'amicale di i Corsi di Corsica» saria per u 2020. In 2030 a lingua corsa serà classificata cum'è «option langues mortes» da u ministeriu di l'Educazione Naziunale è in 2040 a prima riserva indiana di Corsi serà creata in Boziu.



NOUVELLES FRONTIERES

3 av Mar Sébastiani
20200 BASTIA

0 825 000 825

bastia.nf@nouvelles-frontieres.fr

A dream team

di i più gattivi di u sporting

Da poi sempre, u publicu di Furiani hà di più apprezzatu i ghjucadori chì mettenu i cazzotti, sciambuloni è capate ch'è i ghjucadori tènnichi. Eccu a dream team di i bad boys di u Skeubeu...

Pascal Olmeta

Siguramente l'ex-ghjucadore bastiacciu u più famosu. Hà statu pocu a u Sporting (81-84), u tempu di mostrà u so putenziiale. In Furiani, hè sopr'à tutta cunnisciutu pè a so cullata « à u grillage » di a tribuna Sud per chjappà un sustenidore turchinu chì avia sciaccatu un calciu in piena faccia à u « juge de touche »...

Pierrot Bianconi

Di sicuro u più leggendariu di i castagnoni di a storia sana di u « Skeubeu ». E so qualità fisiche è ancu tènniche, a so scimità nant'à u terrenu (da 82 à 93) è a so tràgica sorte, n'anu fattu u veru mitu per parechje generazioni di Furiani. A so epupea hè da leghje nant'à u celebre è apprezzatu situ <http://ultrasbastiacci.online.fr>

Patrick Valery

Stu laterale mancinu, d'origine corsa, era digià da tempu unu di i ghjucadori i più duri di u campionatu francese. Trà 96 et 2001, hà cuntribuitu à mantene a reputazione d'Armand Cesari. L'accaniti s'arricordanu sempre di u macciu contr'à u PSG è di i so attentati nant'à Robert è Ianovski (espulsione à a 43a minuta).

Charlot Orlanducci

Cugnumatu « U Leone di u Viscuvatu », Charlot hà guasi fattu a so carriera sana (da 69 à 87, for'di una meza stagione à u Red Star) sott'à a maglia turchina. D'ellu si dicia chì « u ballò passava, ma

l'attaccante micca ». Trà e so vittime e più famose, ritenimu i puveretti di Delio Onnis (chì si facia sempre ciavattà in Furiani), è sopr'à tuttu u messin Tony Kurbos, lampatu seccu dà un cazzottu tremendu (eppo inviatu a l'ospidale in u statu di « mezu coma ») in Cuppa di Francia di u 1984.

Jeannot Vincenti

Stu ghjucadore di l'anni 60 (epica da veru magnifica per tutti i sustenidori chì l'anu campata) facia parte di a famosa difesa cù Farina è Freddy Gandolfi, chì sparghjì u terrore nant'à tutti i terreni di u campionatu. Hè oramai leggendariu pè u tackle di l'astru mondu chì avia propriu scalpighjatu u so attaccante, è pè u so cummentu a i cumpagni « guardate puru nentru u scarpu, o tantu ci hè sempre u pede di u tippu » !

Cyril Rool

Pistellu di u decenniu passatu (93-98), hè u ghjucadore u più sanziunatu di tutta a storia di u campionatu di Francia (più di 20 cartoni rossi è di 150 cartoni gialli !). A lista di e so malfatte hè cuntata nant'a u sempiternu situ UB : <http://ultrasbastiacci.online.fr/recits/rool.htm>

Johnny Rep

In Bastia, a megastar olandese (chì facia parte di a grandissima squadra Oranje à i Mundiali 74 è 78) era più cunnisciutu pè a so classa è a so reputazione di dunnaghju, chè pè e so malfatte. Purtantu, stu geniu di u ballò

merita a so selezione pè un solu fattu : u tremendu « coup de coude » sciaccatu à u talianu Caporale (cascatu seccu seccu è rimpiazzatu subitu), contr'à Torino à u Comunale, quella sera di Dicembre 78 chì firmerà pè l'eternità in i cori di tutti i Corsi di u mondu.

Laurent Moracchini

Difficile di cumpone una selezione degna, senza ch'ellu figuressi nentru u fiumurbacciu di Chisà. À u mezu terrenu, è da 85 a 97, fù l'autore di certe di è più spaventose malfatte di Furiani. Ramintemu e memurevule capate à Di Meco (chì si pigliava à l'epica pè un super -caldu di u campionatu) è à l'insuppurtevule pinz capitanu di Guingamp, Coco Michel. In ogni casu, u risultatu fù chjaru è nettu : un nasu rotto pè i dui pretensiunuti...

Carlos Borges

Oghje ghjucadore scunnisciutu, Carlos Borges, ùn era micca u più viulentu di i N°9 ch'anu ghjucatu pè u nostru Sporting (87-88). Ma senza nisuna esitazione, era u più maturu ! Capelli lunghi, cusciotti di l'astru mondu è short rikiki, calzette basse, l'uruguaianu era veramente un cavallu scemu. Poche risate quand'omu u vidia fiascà solu solu davant'à u but, è dopu rumà cum'è un cignale in terra fendu finta di pienghjula ! Averete capitu chì sta capra di prima trinca si facia assai magagnà da u publicu. È bella sicura, ùn si ne rindia micca contu, è u poverettu si girava ver'di e tribune pè dumandà u sustegnu...



Piotr Swierczewski

Torna un bellu specimen chì n'hà fattu tantu cù u Sporting (95-2001) dopu un passaghju à Saint-Etienne (omu si ramenta l'azzuffu maiò contr'à Bordeaux). Vista a so casata imprununciabile, fu in furia chjamatu « Piotr » o « U Pulunese ». Ghjucadore di talentu, ma assai duru, era sempre u primu à difende i cumpagni quand'ella ci nascia nant' u terrenu.

Pierre-Yves André

Quella selezione ùn pudia esse ghjusta è obbiettiva senza un ghjucadore sempre in attività. Averiamu pussutu sciaccà un tippu cum'è Medhi Meniri chì ultimamente si face assai rimarcà sott'a maglia turchina, ma ci si vulia un'attaccante. A scelta di u nostru capitanu oghjincu hè apparsa naturale. Pierre-Yves ùn si hè mai lasciatu fà,

è pò testimonià d'un bellu saccu di cartoni rossi e gialli (azzuffi contr'à Pascal Nouma per esempiu).

Ugnunu averà u so avvisu nant'à a selezione. È ghjè per quessa ch'è no simu ubligati di cità astri pistelli chì averianu pussutu figurà nentr'a à l'11 di i Castagnoni : u laterale bascu Jean-Louis Cazes (75-85), u stoppeur è capitanu di a Cuppa '81 Paulu Marchioni (74-80), u Serbu Nisa Saveljic chì minava ancu i giornalisti (2003-04), u guerrieru di Fanfan Felix (71-78) o u difensore sardignolu Paolo Farina (58-71) è a so famosa « machine a bosseler » (i calci).

Ma u Sporting, a sapemu tutti, ùn hè micca un club cum'è l'astri. È i castagnoni sò sempre stati numerosi, ancu in giru à a squadra. E dunque lògicu

di mininà Intrenore scimulitu Freddy Antonetti (94-2001), u Presidente Trapanatu Yves Canarella (92-93), u Direttore Spurtivu Minacciosu Jules Filippi (anni 70) sempre calibratu in i vestiaires è ch'avia braccatu u nizzardu Jean-Pierre Adams (1976).

In fine, avemu tenutu à rende umagiu à i sustenidori à traversu u poverettu di Philippe Villa (sparitu parechji anni fà è protagonista di parechji azzuffi famosi cum'è quelli di Nîmes (contr'à Angers in Cuppa '70) è u fumurbacciu "Kempes" chì avià tichjatu di colpi u furdanu d'arbitru Monsieur Nouet contr'a Dijon (1989).

Ghjuvan Petru Elkasbacca





Antone Marielli

(Diana di l'Alba)

Napuleò o Pasquale Paoli ?

Paoli parchì l'altru avia sempri una : «nappe-au-lait-au-nez» !

1	N	X
---	---	---

ACA o SCB ?

Sò paru tuttu'è dui parchì ùn vali nulla stu pocu.

1	X	2
---	---	---

Marie-Claude Pietragalla o una Pietra calda ?

Parchì Petragalla hè più calda cà un petra...

X	N	2
---	---	---

Corse-Matin o Télématin ?

Corse-matin parchì a matina ùn feghju mai a télé...

X	N	2
---	---	---

Christian Clavier o Christophe Barbier ?

Nè unu, nè l'altru ! Parchì barba ùn ne aghju è prifergu a chitarra !

1	X	2
---	---	---

Vacanze in Evisa o vacanze in Ibiza ?

Ibiza parchì ci voddu andà cù una vittura di a marca !

1	N	X
---	---	---

Gilles Simeoni o Gilles Simon ?

Simeoni parchì Gilles Simon, a si monta troppu !

X	N	2
---	---	---

Frédéric Lefèbvre o Jean Lefèbvre ?

Jean Lefebvre, parchì Frédéric si faci i filmi, l'altru i faci...

1	N	X
---	---	---

Novi o L'académie des neuf ?

Novi ancu s'èddi sò mai stati 9 nant'à a scena !

X	N	2
---	---	---

Jean-Paul Poletti o Joseph-Guy Poletti ?

Ghjuvan' Paulu parchì a voci di latru hè cusì goffa !

X	N	2
---	---	---

Populu vivu o Paupaul Natali ?

Populu vivu parchì u nosciu populu hè più cà vivu par sempri.

X	N	2
---	---	---

Mai Pesce o Maïté ?

Nè unu nè l'altu, mai più !

1 2

Loana o Veolia ?

Parchì cù Loana duva voli andà ?

1 N

Diana di l'Alba o Jessica Alba ?

Jessica Alba parchì ind'è «Diana di l'alba» sò tutti goffi !

1 N

Jean-Christophe Angelini o Jean-Vitus Albertini ?

Jean-vitus parchì u so nomu «Vitus» mi piaci troppu !

1 N

Louis la Brocante o Louis Franceschi ?

Louis la Brocante parchì ti vendi sempri qualcosa !

N 2

U paese di Lama o Serge Lama ?

Lama : parchì hè fiuritu, l'altu hè penciulu è lamaghjunosu !

N 2

U cervu corsu o u Tchernobyl ?

U cervu corsu parchì eddu campa in una natura pura...

N 2

Johnny Rep o i legionarii di u 2ème REP ?

Johnny Rep parchì eddu tira u ballò, l'altri à palle rosse !

N 2

Camille de Rocca Serra o Corsica Sera ?

Corsica sera parchì priferghu fighjulà ad edda cà quill'altu !

1 N

Lara Fabian o Patrick Devedjian ?

Fabian parchì codda di 5 ottavi, l'altu si ni stà in pianu !

N 2

5 frutti è legumi à ghjornu o 5 pastizzi à ghjornu ?

5 pastizzi beddi zeppi.. cù un ligumu : u citrollu !

1 N

Mouss'or o Mouss Diouf ?

Mouss's'or parchì hè robba noscia... naturali...

N 2

Charles Pasqua o luni di Pasqua ?

U luni di Pasqua parchì Pasqua prifirisci fistighjà à Carnavali !

1 N

Emile Zuccarelli o Emil Kostadinov ?

Parchì mi lù à Milou !

1 2

Jacques Audiard o Michel Audiard ?

Parchì ani fattu un tazzu par nunda !

N 2

Jean-Claude Guazzelli o Jean-Claude Vandamme ?

Guazzelli parchì a so voci hà da fà fughja à Van Damme.

N 2



Laverie du Port
25 r Luce de Casabianca
20200 BASTIA
04 95 32 25 51

2000 anni di losers è di winners

2000 anni di losers

Arrigu Bel Messere

Si sà pocu affare nant' à u conte Arrigu, mancu s'ellu hà esistitu da veru. Ma a legenda dice cusì : semu in l'annu 1000 è a Corsica cunnosce grazia à Arrigu Bel Messere, conte di Corsica, un'epica di prusperità è di pace. L'omu hè dirittu, face ristabilisce l'ordine è face piantà e violenze. Un gèneru di Sarkozy di u Medievu... Ma a ghjelusia è a pulitichella ripiglianu a suprana (digjà tandu !) è l'omu si face tumbà in listessu tempu ch'è i so sette figlioli. Cusì ripiglianu e lite, e guerre è l'anarchia è, firmerà sta frasa celebre : « hè mortu Arrigu Bel Messere, è Corsica ùn averai mai bè »... Da tandu, ci trascinemu una spezia di maledizione chì vole chì u nostru destinu ùn sia ch'è castichi, danni è baccalà. Allora circhemu di scunghjurà sta gattiva sorte è femula finita cù l'anticu pessimisimu di Tonton Arrigu !

A concia di Ponte Novu... è i suldati tedeschi

Ahè, ùn ci l'hà pussutu fà stu bravu Pasquale. 15 anni d'indipendenza dappoi a consulta di A Casabianca in u 1755, ùn pudia stà. U Reame di Francia mette u pacchettu è l'armata a più forte di u mondu si ritrova in a sinistra valle di Golu à affruntà e truppe di Paoli. Ci vole à di chì u Capigenerale di a Nazione Corsa hà avutu a gattiva edea di mette i so mercenarii tedeschi nant' à u ponte.



Ma questi quì ùn ci capiscenu nunda è si metteno ancu à tirà nant' à i suldati corsi. Ah si a «Méthode Assimil» avia esistitu à l'epica... Và bè chì l'alemani si richjapperanu in Siviglia in 1982 cun Harald Schumacher, ma quantunque !

U Sporting

Hè finitu u tempu di i Papi, Djazic, Rep, Moravcik... eccu u tempu di i Deblock, Jau, Cherrad... A fine di u Sporting principia cù a maladetta scunfitta di a finale di a coppa di Francia contr' à Lorient in u 2002 (di tutte e manere ùn si pudia vince cù Uras, Dieuze è Prince, era scritta chì sta squadra ùn pudia entre in a storia). Dapoi, u stadiu ùn finisce di viutassi, a passione sminuisce, i macciacci si seguìteghjanu è a falata ùn s'arresta più. Gattiva gestione, affare di u cummediante Chimbonda po quelli di Kébé, Thiriez chì si scatena (« je ne veux plus de clubs corses en L1 »), rompitura cù i sustenidori... passanu e stagioni è ùn si vede cumu e cose si ponu arrangià. Ma a storia ci hà mustratu ch'ellu ci hè sempre un miraculu à u Sporting. Alè, si Bastia ùn fala in National quist'annu,

quellu dopu ricullemu in L1 ! Hum...

Quelli chi anu liccatu u culu à Clavier è Sarko

A Corsica dinù hà cunnisciutu u so 11 settembre neru. Hè à sta data, di l'annata 2004, chì Christian Clavier presenta « L'Enquête Corse » in Portivechju. Sò tutti quì : Jean Reno, Nicolas Sarkozy cun Camille de Rocca Serra cum'è maestru di cerimonia. À u prugramma : frittelle, aligostie è vinu rossu di u Sartinese. In più di passà à a risa, semu felici d'esse a nova destinazione di i Pippulacci chì ci volenu fà crede « qu'ils adorent les keurses ». Trà d'elli, discorrenu di prugetti di villà cù u prefettu (vede a videò chì circuleghja nant' à dailymotion http://www.dailymotion.com/video/x6mrxm_magouilles-people-politique-sarkozy_news) Un grande mumentu d'autoflagellazione ! Sarko è Jacquouille ci facenu crede ch'ellu hè una stonda impurtante in a storia di a Corsica, è poveri à noi, semu cuntenti di manghjà i pisticciuli chì fermanu. Merci Grand Bwana !



2000 anni di winners

A resistenza à i Rumani

V'arricurdate di i irréductibles Gaulois, sempiterni è eròichi resistenti à l'armate di Jules Cesar ? Una magagna accantu à i nostri antichi ! Pensata appena : cunquista rumana di a Gallia = 8 anni. Cunquista rumana di a Corsica = 150 anni ! Ci hè vulsutu chì Roma mandessi u fiore di e so legioni è millaie di suldati per riesce à pacificà l'isula sana. 150 anni di resistenza accanita è terribule battaglie cù i populi di l'internu ! Questi quì, di i Rumani ùn ne vulianu sente parlà, cù e so sandalacce di coghju è a so strana lingua latina. Bon, trippa si più tardi semu diventati ancu noi latini, ma à quandu a reabilitazione di l'eroi cumbattenti di l'antichità ? À quandu un filmu di Mel Gibson ?

U Sporting (1978 è 1981)

Và bè ch'ellu ci piace à criticallu u nostru Sporting, ma quantunque, ci hà fattu sunnià più d'una volta. « Un ghjornu, st'isulottu stunerà l'Auropa » avia dettu u bravu Jean-Jacques Rousseau. 200 anni dopu, u SECB flamba in cuppa d'Auropa cun Papi, Rep, Krimau, Orlanducci è cumpagnia... Una squadra di leoni, un stadiu degnu di u terzu mondu, un publicu scatinatu chì cunnosce u sintimu di a vittoria per a prima volta di a so storia. Pocu impreme s'è no avemu persu in finale, Thierry Roland biscava è a testa di moru era alzata in l'Auropa sana. In l'81, hè u grande Saint-Etienne di Platini à esse scuzzulatu in finale à u Parcu di i Principi. Ancu di grazia ch'elle ci fermanu e vechje K7 videò...

A vittoria di U Borgu è l'ape guerriero di Calinzana

Si parla sempre di a disfatta di Ponte Novu, ma ùn saria micca bè di festighjà e vittorie, nò ? Ci vole à di chì e chjibbe, ùn l'avemu micca sempre pigliate noi. In u 1731, l'Alemania manda i so

suldati per aiutà i Genuvesi chì ùn ci la facenu à calmà e rivolte. In u 1732 l'assaltu hè datu à u paese di Calinzana da u culunnellu Wachtendonck. I Corsi si battenu cum'elli ponu è lampanu nant'à e truppe tedesche tuttu ciò ch'elli anu. Spulanu ancu bugne, è l'ape inzergate si mettenu à pizzicà i suldati chì ùn sanu più chì fà. Hè cusì chì senza Baygon Jaune, e truppe frestere cunnoscenu una terribule concia contr' à l'ape patriotte di Calinzana. D'ottobre 1768 hè u paese di U Borgu chì vede a vittoria di l'armata paulina contr' à l'armata francese.

U clanu

È fà è fà, è u clanu hè quello chì passa è vince. L'anni passanu è si cuntinuveghja à cantà « ùn andemu à vutà per sti purcellacci techji »... Iè, nimu i pò vede, tutti criticheghjanu, ma quand'ellu ci vole à vutà, si lampa ! Cusì, sò sempre elli chì finiscenu per guadagnà. Facenu unepochi di millennii ch'elli guvernanu a Corsica è ùn si vede cum'ella puderà scambià. Pigliemu e scumesse per l'elezzioni di u 2010 ?

L'eroi di e rivolte

Bon d'accordu, ùn anu micca sempre vintu à a fine, ma sò i grandi persunagi di a storia corsa : Sambucucciu d'Àlandu chì hà cunduttu a rivolta popolare contr'à i signori in u 1358 è chì hà lampatu tutti i castelli di l'isula. U bustanichese Defranchi, dettu Cardone, chì hè à l'origine di a guerra contr'à Genuva in u 1729 è chì sbuccerà nant'à l'indipendenza di a Corsica sott'à Pasquale Paoli, grande umanistu è omu di i Lumi. Ci la ferà à custruisce un paese cù un'armata, una muneta, un'università. Si parla menu di Luigi Giafferri, Ghjacintu Paoli, Andria Ceccaldi, Ghjuvanpetru Gaffori, Sebastianu Costa...

Casella di Nonza

1768, e truppe di u Rè di Francia assaltanu a Corsica. U generale Grandmaison s'occupa di u Capicorsu è cerca di piglià a torra di Nonza. Hè u capitanu Ghjacumu Casella chì tene a torra. A resistenza paulista tene forte di pettu à i suldati francesi. Purtantu, Casella hè solu solu : hà inventatu un sistema ingenuosu per pudè tirà u cannone è i fucili in listessu tempu ! I francesi penseranu ch'elli c'eranu parecchi omi...

I preti patrioti

À i tempi induve a religione tene un rollu impurtante assai in a sucetà corsa, sò parecchi i religiosi à piglià partitu per una guerra contr'à i Genuvesi. Cusi sò stati Tèramu Orticoni, prete Natali,

prete Salvini autore di u Disinganno chì ghjustificheghja di fà a guerra à Genuva è ancu Circinellu, prete di Guagnu è patriottu chì ùn vulia sente parlà d'una Corsica francese.

A squadra di Corsica 1967

27 ferraghju 1967. À u Vélodrome di Marseglia, nant'à u pannellu si leghje : « Corse 2, France 0 » ! Incredibile, ma una selezione corsa purtata da Jean-Jean Camadini, Paul Orsatti, Freddy Gandolfi è Etienne Sansonetti ridiculizeghja i tricolore di u puverettu di Just Fontaine, completamente abbambanatu. Si l'affare si fussi passatu oghje, micca siguru chì Raymond Domenech è Thierry Roland sopravvissinu...

A Piazzetta hè un giornale **GRATISI**, fattu da una squadra di **BENEVULENTI**. Tiratu à 10 000 esemplarii, hè distribuitu in parecchi lochi di Corsica. S'è vo vulete aiutacci, pudete abbonarvi à u nostru giornale per ricevelu in **CASA VOSTRA**.

Nome : _____ Casata : _____

Indirizzu : _____

Codice pustale : Cumuna : _____

6 nùmeri (15 €)

Sustegnu (30 €)

Mandate u vostru sceccu à l'ordine di :

L'Associu Lingua Scritta
1, ruelle du Dragon
20200 Bastia



Centru Culturale Universitariu

Programmazione culturale ottobre - dicembre 2009



Università di Corsica

Spaziu Culturale Natale
Luciani Campus Mariani

Entrata :

10 €, 5 € prezzu
studentinu, pussibilità
d'abbonamentu.

Infurmazione è riservazione :

Centru Culturale
Universitariu
Tél. 04 95 45 00 78
lminico@univ-corse.fr

Cortinscena - Spetàculi teatrali

8 ore è mezu di sera, Spaziu Culturale Natale Luciani – Campus Mariani

Mercuri 7 d'ottobre

Ultima visita
Unità Teatrale

Mercuri 14 d'ottobre

Occident
Compagnie Théâtre Alibi

Mercuri 4 di novembre

Les Contes fantastiques
Compagnie NéNéka

Mercuri 18 di novembre

Double jeu

Mercuri 9 di dicembre

Elle furmiculimi in vignale
U Teatrinu

Corsic'Artisti - Spetàculi musicali

9 ore di sera, Spaziu Culturale Natale Luciani – Campus Mariani

Marti 13 d'ottobre

Diana di l'Alba

Mercuri 21 d'ottobre

Voce Orma cun Éric Mattei
Tony Toga
Anghjula Potentini

Marti 17 di novembre

I Mantini

Mercuri 25 di novembre

Generazione settanta cun
Cinqui Sò

Chjar' di Luna

Petru Baghioni

Mercuri 16 di dicembre

Veghja Nustrale cun Dopu Cena
Associu A Veghja
Ochju à ochju

Associu di u Chjam'è Rispondi

Marti 1u di dicembre

Francine Massiani




I spetàculi di u mercuri seranu filmati è diffusati
nant'à u situ internet : www.acorsicatv.com
À truvacci in Corti !

E pievi di Corsica

versu 1730

Si chjamanu « pievi » e vechje divisione amministrative di a Corsica. Corrispondenu à l'antichi cantoni (inventati elli dopu à a cunquista francese). E limite di e pievi sò naturale (serre di muntagne, fiumi) è sò spesse antiche assai. Per esempiu certi nomi rimandanu à un'epica protostorica (Tàravu, Tàlcini, Opinu...), d'altre anu un'origine rumana (Ampugnani, Mariana).

À u Medievu, Pisa s'hè appughjata nant'à ste strutture per impatrunissi di u territoriu è hà reorganizatu e pievi. À u centru d'ogni pieve si trovava una chjesa maiò (chjamata dinù « pieve » o « chjesa piuvana »). Era un locu impurtante da un puntu di vista religiosu (si facianu quì i battezimi è l'interri) ma dinù di putere. Custi si rendia a ghjustizia è eranu pigliate decisioni impurtante durante l'assemblee popolare. Stu locu d'addunita di e cumunità si chjamava « arringu » « petra à l'arringu », « tribuna » o « tribunale ». Fruttu d'una storia antica è di a geografia di l'isula, e pievi sò arradicate in u più prufundu di u spaziu corsu.



- 1 - LURI
- 2 - BRANDU
- 3 - CANARI
- 4 - NONZA
- 5 - LOTA
- 6 - PATRIMONIU
- 7 - BASTIA
- 8 - OLETTA
- 9 - OLMETA
- 10 - SANTU PETRU
- 11 - SAN QUILICU
- 12 - MARANA
- 13 - CASINCA
- 14 - CASACCUNI
- 15 - BIGORNU
- 16 - CANALE
- 17 - OSTRICONI
- 18 - TUANI
- 19 - S. ANDRIA
- 20 - AREGNU
- 21 - CALVI
- 22 - TAVAGNA
- 23 - AMPUGNANI
- 24 - RUSTINU
- 25 - CACCIA
- 26 - GHJUNSANI
- 27 - PINU
- 28 - MURIANI
- 29 - OREZZA
- 30 - VALLERUSTIE
- 31 - GHJUVELLINA
- 32 - OLMIA
- 33 - CAMPULORI
- 34 - ALISGIANI
- 35 - BOZIU
- 36 - TALCINI
- 37 - NIOLU
- 38 - PIEVE D'IMPIAGHJERA DI E CUMUNITÀ MUNTAGNOLE

- 39 - VERDE
- 40 - SERRA
- 41 - OPINU
- 42 - ROGNA
- 43 - VENACU
- 44 - SEVINDENTRU
- 45 - SIA
- 46 - PIEVE D'IMPIAGHJERA DI E CUMUNITÀ MUNTAGNOLE
- 47 - PIEVE D'IMPIAGHJERA DI E CUMUNITÀ MUNTAGNOLE
- 48 - CASTELLU
- 49 - CELAVU
- 50 - CRUZINU
- 51 - SORRU IN SÙ
- 52 - VICU
- 53 - SALOGNA
- 54 - PAOMIA
- 55 - CURSA
- 56 - COASINA
- 57 - TALAVU
- 58 - CAVRU
- 59 - PERI
- 60 - MEZANA
- 61 - CINARCA
- 62 - AIACCIU
- 63 - PORTI VECHJU
- 64 - SCUPAMENA
- 65 - ISTRIA
- 66 - ORNANU
- 68 - ATTALA
- 69 - VIGHJANI
- 70 - PIEVE D'IMPIAGHJERA DI E CUMUNITÀ MUNTAGNOLE
- 71 - SARTÉ
- 72 - BUNIFAZIU

